



## Al mè paès (Ospitale di Bondeno)

Dal libro **GREPUL** di **Luigi Vincenzi** edizioni Arstudio (2003)

---

I sècul ch'è pasà i conta d'n'isulot con n'usdalét dòv as andava par murir lontan quand che pèsta e varòl, ségul dla mort, j'amdéva int la miseria.

L'aqua dal fium, pasand, la sbiasugava pian n'Ave Maria che al cor dill j'ond, andand, al ripetéva all piop e ai ròz ad rubiljòn adré la riva.

Na fila ad casupleti adré la strada pugiadi contra l'arzan par sustegn, do cà con il tureti, al campanil a punta in mez a piazza con la sò cesa.

Un bcar e dò butégh, na ciòpa d'ustarii al fòran, al barbiér, al calzular, mecànich, frutaròl, al spazi con ... da tut ... dla Clara ad Bis.  
N'antiga tor ad guardia là, ind la curva: la cà dla vecia Gègia;  
al bòragh dal Pradon e, ad cò d'na strada drita, la cèsa dla Madòna e al zimitèri.

Madunina dla Piòpa ... arcòrd ill prucisiòn par la tò fèsta: fil culuradi ad zènt, la musica dla banda, sciflin ... e lus ... e bacaiar dla fiera.

Cmè sempar la Tò man, o Madunina, la seguita a prutèzar stal paès: paès ch'agh sòn nat mi, paès dla bela infanzia e d'na zvantù angustiada, ch'al tien in grembia j'os ad car parent.

Anch se lontan da Ti pr'i cas dla vita, at port sèmpar con mi, at tièn cmè ind una nìcia ... un cantunzin speciàl dentr ind al cuor.